

adr:

ALTERNATIV DEMOKRATESCH
REFORMPARTEI



Här Mars Di Bartolomeo
President vun der Deputéiertechamber
19, um Krautmaart
L-1728 Lëtzebuerg

Lëtzebuerg, den 28. Juli 2017

Här President,

Esou wéi d'Chambersreglement et virgesäit, bieden ech Iech, dës parlamentaresch Fro un den Här Wirtschaftsminister an un den Här Finanzminister weiderzeleeden.

Am Kader vun den Diskussiounen ëm d'Zukunft vu Lëtzebuerg an de stramme Wuesstem wëll Lëtzebuerg op de qualitative Wuesstem opbauen. An deem Zesummenhang huet den Här Wirtschaftsminister an der Chamber gesot, datt am Virfeld vu gréissere Projeten an Investitiounen an Zukunft ëmmer eng Impaktstudie gemaach géif ginn.

Aktuell gi Verhandlung gefouert, fir datt déi amerikanesch Firma Google zu Lëtzebuerg ee gréisseren Datenzentrum ka bauen.

Dowéinst wéilt ech der Regierung dës Froe stellen:

- 1) Ass eng Impaktstudie gemaach ginn oder gétt se am Abléck duerchgefouert?*
- 2) Wéi en Impakt hätt d'Implantatioun vun esou engem groussen Datenzentrum op d'Ëmwelt, op de Landverbrauch, op den Energieverbrauch, op de Waasserverbrauch, op de Verkéier an op de Wunnensmaart vun der Géigend, wou dësen Datenzentrum soll gebaut ginn?*
- 3) Wéi eng finanziell Hëllef si vun öffentlecher Hand geplangt (Staat, Gemeng), z.B. bei den Infrastrukturen oder fir de Kaf vum Terrain a wat ass hei de Käschtepunkt?*
- 4) Wéi wäit bedeelegt Google sech bei de Käschte fir d'Infrastrukturen an den Terrain?*
- 5) Wéi en Impakt hätt dës Implantatioun op d'Steierrecetten (Kierperschaftssteuer, Verméigenssteuer an TVA)?*
- 6) Ass an de Verhandlung Google e Steierruling proposéiert ginn?*

Mat déiwem Respekt

A handwritten signature in black ink, appearing to read "Gast Gibéryen".

Gast Gibéryen

Deputéierten

**Äntwert vum Vize-Premier Minister a Wirtschaftsminister, Häer Etienne Schneider, a vum
Finanzminister, Häer Pierre Gramegna, op d'parlamentaresch Fro nr 3174
vum 28. Juli 2017 vum Deputéierten Gast Gibéryen**

D'Regierung setzt am Kader vun der wirtschaftlecher Entwécklung vum Land als Ziel, e qualitative Wuesstem ze schafen. Dëst Ziel entsprécht esouwuel dem Regierungsprogramm vun Dezember 2013, ewéi dem breede Kader vun der Strategie „Luxembourg 2020“, der Ëmsetzung vun den europäesche Leitlinien, déi d'Regierung am Kader vum Plan national de réformes (PNR) all Joers à jour setzt.

Den ICT-Secteur ass e besonnesch wichtege Secteur, fir déi wirtschaftlech Diversifizéierung vum Land weider ze driwen. Dee Secteur kann de Kritäre vum qualitative Wuesstem entsprechen, well en héich qualifizéiert Aarbechtsplaze schafft a well en d'Applikatioun vu ville neien Technologien erméiglecht, déi mei Produktivitéit a verschiddene Beräicher mat sech bréngen. Am Kader vun der Rifkin Strategie ass dowéinst de Fokus op nei ICT Technologië gesat ginn, déi zesumme mat den erneierbaren Energien an der intelligenter Mobilitéit en Deel vun der drëtter industrieller Revolutioun duerstellen.

Wann am Beräich ICT eng Entrepris envisagéiert zu Lëtzebuerg ze investéieren, dann ass dat e Projet dee vu strategescher Wichtigkeet ass. Am Intérêt vun enger eventueller Realiséierung vun engem Projet, kann d'Regierung keng Detailer ginn iwwert Gespréicher a Planungen, déi net ofgeschloss sinn. Et ass evident, dass de legale Kader respektéiert gëtt.